

T742/227c(3)

THE CHINESE-JAPANESE LIBRARY
OF THE HARVARD-YENCHING INSTITUTE
AT HARVARD UNIVERSITY

SEP 27 1955

春秋穀梁傳

一之六

CM 0	1	2	3	4	5	6	7	8	9	10	11	12	13	14	15	16	17							
Lab D50 2°	95/0/2	81/0/0	66/0/0	51/0/1	35/0/0	20/0/0	29/19/-54	55/-39/33	42/57/29	82/4/79	51/50/-13	50/-28/-29	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68

Harvard College Library Imaging Services <http://imaging.harvard.edu>

穀梁傳序

哈佛大學
哈佛燕京
圖書館
珍藏印

五
三
三

昔周道衰陵，乾綱絕紐，禮壞樂崩，彝
倫攸斁，弑逆篡盜者國有。淫縱破義
者比肩。是以妖災因釁而作，民俗染
化而遷。陰陽爲之愆度，七曜爲之盈
縮。川嶽爲之崩竭，鬼神爲之疵癘。故

父子之恩缺，則小弁之刺作。君臣之禮廢，則桑扈之諷興。夫婦之道絕，則谷風之篇奏。骨肉之親離，則角弓之怨彰。君子之路塞，則白駒之詩賦。天垂象，見吉凶。聖作訓，紀成敗。欲人君戒愼厥行，增修德政。蓋誨爾諄諄，聽

我藐藐，履霜堅冰，所由者漸。四夷交侵，華戎同貫。幽王以暴虐見禍，平王以微弱東遷。征伐不由天子之命，號令出自權臣之門。故兩觀表而臣禮亡，朱干設而君權喪。下陵上替，僭迫理極。天下蕩蕩，王道盡矣。孔子覩滄

海之橫流，迺喟然而嘆曰：文王既沒，文不在茲乎？言文王之道喪，興之者在已。於是就大師而正雅頌，因魯史而備春秋，列黍離於國風，齊王德於邦君，所以明其不能復雅，政化不足以被群后也。於是則接乎隱公，故因

茲以託始，該二儀之化育，贊人道之幽變，舉得失以彰黜陟，明成敗以著勸誡，拯頽綱以繼三五，鼓芳風以扇遊塵，一字之褒，寵踰華袞之贈，片言之貶，辱過市朝之撻。德之所助，雖賤必申；義之所抑，雖貴必屈。故附勢匿

非者無所逃其罪。潛德獨運者無所
隱其名。信不易之宏軌。百王之通典
也。先王之道既弘。麟感化而來。應因
事備而終篇。故絕筆於斯年。成天下
之事業。定天下之邪正。莫善於春秋。
春秋之傳有三。而爲經之旨一。臧否

不同。褒貶殊致。蓋九流分而微言隱。
異端作而大義乖。左氏以鬻拳兵諫。
爲愛君。文公納幣爲用禮。穀梁以衛
輒拒父爲尊祖。不納子糾爲內惡。公
羊以祭仲廢君爲行權。妾母稱夫人
爲合正。以兵諫爲愛君。是人主可得

而脅也。以納幣爲用禮。是居喪可得
而婚也。以拒父爲尊祖。是爲子可得
而叛也。以不納子糾爲內惡。是仇讐
可得而容也。以廢君爲行權。是神器
可得而窺也。以妾母爲夫人。是嫡庶
可得而齊也。若此之類。傷教言義不

可得彊通者也。凡傳以通經爲主。經
以必當爲理。夫至當無二。而三傳殊
說。庸得不棄其所滯。擇善而從乎。旣
不俱當。則固容俱失。若至言幽絕。擇
善靡從。庸得不並舍以求宗。據理以
通經乎。雖我之所是。理未全。當安可

以得當之難而自絕於希通哉。而漢
興以來，環望碩儒，各信所習，是非紛
錯，準裁靡定，故有父子異同之論，石
渠分爭之說，廢興由於好惡，盛衰繼
之辯訥。斯蓋非通方之至理，誠君子
之所歎息也。左氏豔而富，其失也誣。

穀梁清而婉，其失也短。公羊辯而裁，
其失也俗。若能富而不誣，清而不短，
裁而不俗，則深於其道者也。故君子
之於春秋，沒身而已矣。升平之末，歲
次大梁，先君北蕃，迴軫頓駕于吳，乃
帥門生故吏，我兄弟子姪，研講大籍。

次及三傳左氏則有服杜之註公羊
則有何嚴之訓釋穀梁傳者雖近十
家皆膚淺末學不經師匠辭理典據
既無可觀又引左氏公羊以解此傳
文義違反斯害也已於是乃商畧名
例數陳疑滯博示諸儒同異之說吳

天不弔○泰山其頽○匍匐墓次○死亡無
日○日月逾邁○跋及視息○乃與二三學
士及諸子弟各記所識并言其意業
未及終嚴霜夏墜○從第凋落○二子泯
沒○天實喪予○何痛如之○今撰諸子之
言各記其姓名名曰春秋穀梁集解

張榜曰篇
中多設疑
匪使人欲
迷

張榜曰
六字為一
句一句四
轉收盡一
篇實是力
狂九鼎

隱讓則隱善矣。善則其不正焉。何也。春秋貴義而
不貴惠。信道而不信邪。孝子揚父之美。不揚父之
惡。先君之欲與桓。非正也。邪也。雖然。既勝其邪心。
以與隱矣。已。探先君之邪志。而遂以與桓。則是成
父之惡也。兄弟天倫也。為子受之父。為諸侯受之
君。已廢天倫而忘君父。以行小惠。曰小道也。若隱
者。可謂輕千乘之國。蹈道則未也。

三月公及邾儀父盟于昧

及者何。內為志焉。爾儀字也。父猶傳也。男子之美

稱也。其不言邾子何也。邾之上古。微未爵命於周
也。不日其盟。淪也。昧地名也。

夏五月鄭伯克段于鄆

克者何能也。何能也能殺也。何以不言殺。見段之
有徒眾也。段鄭伯弟也。何以知其為弟也。殺世子
母弟。目君以其目。君知其為弟也。段弟也。而弗謂
弟。公子也。而弗謂公子。貶之也。段失子弟之道矣。
賤段而甚鄭伯也。何甚乎鄭伯。甚鄭伯之處心積
慮。成於殺也。于鄆遠也。猶曰取之其母之懷中而

張榜曰
得透斷得
嚴

張栻曰代
田一處識
見筆力俱
通

仲子耳公曰
桓母穀曰惠母
於時便同異
乃爾

殺之云爾甚之也然則為鄭伯者宜奈何緩追逸
賊親親之道也

秋七月天王使宰咺來歸惠公仲子之賵

母以子氏仲子者何惠公之母孝公之妾也禮賵
人之母則可賵人之妾則不可君子以其可辭受
之其志不及事也賵者何也乘馬曰賵衣衾曰襚
貝玉曰含錢財曰賻

九月及宋人盟于宿

及者何內卑者也宋人外卑者也卑者之盟不日

宿邑名也

冬十有二月祭伯來

來者來朝也其弗謂朝何也寰內諸侯非有天子
之命不得出會諸侯不正其外交故弗與朝也聘
弓鏃矢不出竟塲束脩之肉不行竟中有至尊者
不貳之也

公子益師卒

大夫日卒正也不日卒惡也

二年春公會戎于潛

會者外爲主焉爾。知者慮義者行仁者守。有此三者然後可以出會。會我危公也。

夏五月莒人入向

入者內弗受也。向我邑也。

無佞帥師入極

入者內弗受也。極國也。苟焉以入人爲志者人亦入之矣。不稱氏者滅同姓貶也。

秋八月庚辰公及戎盟于唐

九月紀履緌來逆女

逆女親者也。使大夫非正也。以國氏者爲其來交接於我故君子進之也。

冬十月伯姬歸于紀

禮婦人謂嫁曰歸。反曰來歸。從人者也。嫁人在家制於父。既嫁制於夫。夫死從長子。婦人不專行必有從也。伯姬歸于紀。此其如專行之辭何也。曰非專行也。吾伯姬歸于紀。故志之也。其不言使何也。逆之道微無足道焉爾。

紀子伯莒子盟于密

或曰紀子伯莒子而與之盟或曰年同爵同故紀子以伯先也 二解俱趣

十有二月乙卯夫人子氏薨

夫人薨不地夫人者隱之妻也卒而不書葬夫人之義從君者也

鄭人伐衛

三年春王二月己巳日有食之

言日不言朔食晦日也其日有食之何也吐者外壞食者內壞闕然不見其壞有食之者也有內辭

張榜曰新

也或外辭也有食之者內於日也其不言食之者何也知其不可知也

三月庚戌天王崩

高曰崩厚曰崩尊曰崩天子之崩以尊也其崩之何也以其在民上故崩之其不名何也大上故不名也

夏四月辛卯尹氏卒

尹氏者何也天子之大夫也外大夫不卒此何以卒之也於天子之崩為魯主故隱而卒之

秋武氏子來求賻

武氏子者何也天子之大夫也天子之大夫其稱武氏子何也未畢喪孤未爵未爵使之非正也其不言使何也無君也歸使者曰賻歸生者曰賵曰歸之者正也求之者非正也周雖不求魯不可以不歸魯雖不歸周不可以求之求之為言得不得未可知之辭也交譏之

張榜曰意分疏而詞通合

八月庚辰宋公和卒

諸侯日卒正也

冬十有二月齊侯鄭伯盟于石門

癸未葬宋繆公

日葬故也危不得葬也

四年春王二月莒人伐杞取牟婁

傳曰言伐言取所惡也諸侯相伐取地於是始故謹而志之也

戊申衛州吁弑其君完

大夫弑其君以國氏者嫌也弑而代之也

夏公及宋公遇于清

及者內為志焉爾遇者志相得也

冬公陳侯蔡人衛人伐鄭

秋鞏帥師會宋公陳侯蔡人衛人伐鄭

鞏者何也公子鞏也其不稱公子何也貶之也何為貶之也與于弑公故貶也

九月衛人殺州吁于濮

稱人以殺殺有罪也祝吁之挈失嫌也其月謹之也于濮者譏失賊也

冬十有二月衛人立晉

衛人者眾辭也立者不宜立者也晉之名惡也其稱人以立之何也得眾也得眾則是賢也賢則其

曰不宜立何也春秋之義諸侯與正而不與賢也

五年春公觀魚于棠

傳曰常事曰視非常曰觀禮尊不親小事卑不尸大功魚卑者之事也公觀之非正也

夏四月葬衛桓公

月葬故也

秋衛師入郟

入者內弗受也邾國也將卑師衆曰師
九月考仲子之官

考者何也考者成之也成之爲夫人也禮庶子爲
君爲其母築宮使公子主其祭也於子祭於孫止
仲子者惠公之母隱孫而脩之非隱也

初獻六羽

張栻曰兩
存其說一
若幾魯者
一若與魯
若德之即
書以甚天

初始也穀梁子曰舞夏天子八佾諸侯六佾諸侯
四佾初獻六羽始僭樂矣尸子曰舞夏自天子至
諸侯皆用八佾初獻六羽始厲樂矣

邾人鄭人伐宋

蝗

蟲災也甚則月不甚則時

冬十有一月辛巳公子彊卒

隱不爵命大夫其曰公子彊何也先君之大夫也

宋人伐鄭圍長葛

伐國不言圍邑此其言圍何也久之也伐不踰時
戰不逐奔誅不填服苞人民毆牛馬曰侵斬樹木
壞宮室曰伐

六年春鄭人來輸平

輸者墮也平之為言以道成也來輸平者不果成也

夏五月辛酉公會齊侯盟于艾

秋七月

冬宋人取長葛

外取邑不志此其志何也久之也

七年春王三月叔姬歸于紀

其不言逆何也逆之道微無足道焉爾

滕侯卒

滕侯無名少曰世子長曰君狄道也其不正者名也

夏城中丘

城為保民為之也民衆城小則益城益城無極凡城之志皆譏也

齊侯使其弟年來聘

諸侯之尊弟兄不得以屬通其弟云者以其來接於我舉其貴者也

秋公伐邾

冬天王使凡伯來聘

戎伐凡伯于楚丘以歸

凡伯者何也天子之大夫也國而曰伐此一人而

曰伐何也大天子之命也戎者衛也戎衛者為其

伐天子之使貶而戎之也楚丘衛之邑也以歸猶

愈乎執也

八年春宋公衛侯遇于垂

不期而會曰遇遇者志相得也

三月鄭伯使宛來歸祊

名宛所以貶鄭伯惡與地也

庚寅我入祊

入者內弗受也日入惡入者也祊者鄭伯所受命

於天子而祭泰山之邑也

夏六月己亥蔡侯考父卒

諸侯日卒正也

辛亥宿男卒

宿微國也未能同盟故男卒也

秋七月庚午宋公齊侯衛侯盟于瓦屋

外盟不日此其日何也諸侯之參盟於是始故謹

而日之也誥誓不及五帝盟詛不及三王交質子

不及二伯

八月葬蔡宣公

月葬故也

九月辛卯公及莒人盟于浮來

可言公及人不可言公及大夫

螟

冬十有二月無佻卒

無佻之名未有聞焉或曰隱不爵大夫也或說曰

故貶之也

九年春天王使南季來聘

南氏姓也季字也聘問也聘諸侯非正也

三月癸酉大雨震電

震雷也電霆也

庚辰大雨雪

志疏數也八日之間再有大變陰陽錯行故謹而

張榜曰高
備貴時

日之也兩月志正也

挾卒

挾者所挾也弗大夫者隱不爵大夫也隱之不爵大夫何也日不成為君也

夏城郎

秋七月

無事焉何以書不遺時也

冬公會齊侯于防

會者外為王焉爾

十年春王二月公會齊侯鄭伯于中丘

夏翬帥師會齊人鄭人伐宋

六月壬戌公敗宋師于營

內不言戰舉其大者也

辛未取郟辛巳取防

取邑不日此其日何也不正其乘敗人而深為利

取二邑故謹而日之也

秋宋人衛人入鄭

宋人蔡人衛人伐戴鄭伯伐取之

不正其因人之力而易取之故主其事也

冬十月壬午齊人鄭人入郕

入者內弗受也日入惡入者也郕國也

十有一年春滕侯薛侯來朝正其來朝人而致其

天子無事諸侯相朝正也考禮脩德所以尊天子

也諸侯來朝時正也猶言同時也累數皆至也

夏五月公會鄭伯于時來

秋七月壬午公及齊侯鄭伯入許

冬十有一月壬辰公薨葬于中丘

公薨不地故也隱之不忍地也其不言葬何也君

弑賊不討不書葬以罪下也隱十年無正隱不自

正也元年有正所以正隱也

桓無王其曰王何也議始也其曰無王何也桓弟

弑兄臣弑君天子不能定諸侯不能救百姓不能

去以為無王之道遂可以至焉爾元年有王所以

十有一年春滕侯薛侯來朝
天子無事諸侯相朝正也考禮修德所以尊天子
也諸侯來朝時正也禮言同時也累數皆至也

夏五出天爭亦五出以五出

秋踰不情不書葬以葬不也出十平無五出不自
公葬不此對也烈之不惑此也其不言葬何也昔

穀梁傳卷二

桓公

元年春王

桓無王其曰王何也謹始也其曰無王何也桓弟

弑兄臣弑君天子不能定諸侯不能救百姓不能

去以為無王之道遂可以至焉爾元年有王所以

治桓也公羊佻逸而深嚴處穀梁過之

正月公即位

繼故不言即位正也繼故不言即位之為正何也

曰先君不以其道終則子弟不忍即位也繼故而
言即位則是與聞乎弒也繼故而言即位是為與
聞乎弒何也曰先君不以其道終已正即位之道
而即位是無恩於先君也

三月公會鄭伯于垂

會者外為主焉爾

鄭伯以璧假許田

假不言以言以非假也非假而曰假諱易地也禮
天子在上諸侯不得以地相與也無田則無許可

知矣不言許不與許也許田者魯朝宿之邑也邴

者鄭伯之所受命而祭泰山之邑也川見魯之不

朝於周而鄭之不祭泰山也

夏四月丁未公及鄭伯盟于越

及者內為志焉爾越盟地之名也

秋大水

高下有水災曰大水

冬十月

無事焉何以書不遺時也春秋編年四時具而後

孫鑛曰此
語與公羊

爲年

二年春王正月戊申宋督弒其君與夷

桓無王其曰王何也正與夷之卒也

及其大夫孔父

孔父先死其曰及何也書尊及卑春秋之義也孔

父之先死何也督欲弒君而恐不立於是乎先殺

孔父孔父闕也何以知其先殺孔父也曰子既死

父不忍稱其名臣既死君不忍稱其名以是知君

之累之也孔氏父字謚也或曰其不稱名蓋爲祖

諱也孔子故宋也

滕子來朝

二月公會齊侯陳侯鄭伯于稷以成宋亂

以者內爲志焉爾公爲志乎成是亂也此成矣取

不成事之辭而加之焉於內之惡而君子無遺焉

爾

夏四月取郟大鼎于宋戊申納于太廟

桓內弒其君外成人之亂受賂而退以事其祖非

禮也其道以周公爲弗受也郟鼎者郟之所爲也

張榜曰綿
綿延延不
知句頭斷
處然讀之
首是可

二語小異公
羊

日宋取之宋也。以是為討之鼎也。孔子曰名從主人。物從中國。故曰郟大鼎也。

秋七月紀侯來朝

朝時此其月何也。桓內弑其君外成人之亂於是為齊侯陳侯鄭伯討數日以賂已。卽是事而朝之惡之。故謹而月之也。

蔡侯鄭伯會于鄧

九月入杞

我入之也

公及戎盟于唐

冬公至自唐

桓無會而其致何也。遠之也。

三年春正月公會齊侯于贏

夏齊侯衛侯胥命于蒲

胥之為言猶相也。相命而信諭謹言而退。以是為近古也。是必一人先其以相言之。何也不以齊侯命衛侯也。

六月公會杞侯于郕

秋七月壬辰朔日有食之既

言日言朔食正朔也既者盡也有繼之辭也

公子翬如齊逆女

逆女親者也使大夫非正也

九月齊侯送姜氏于謹

禮送女父不下堂母不出祭門諸母兄弟不出闕

門父戒之曰謹慎從爾舅之言母戒之曰謹慎從

爾姑之言諸母般申之曰謹慎從爾父母之言送

女踰竟非禮也

孫鑲曰春秋卯禮耶諸則謹嚴自內入

公會齊侯于謹

無譏乎曰為禮也齊侯來也公之逆而會之可也

夫人姜氏至自齊

其不言翬之以來何也公親受之于齊侯也子貢

曰冕而親迎不已重乎孔子曰合二姓之好以繼

萬世之後何謂已重乎

冬齊侯使其弟來聘

有年

五穀皆熟為有年也

四年春正月公狩于郎

四時之田皆爲宗廟之事也春日田夏日苗秋日蒐冬曰狩四時之田用三焉唯其所先得一爲乾豆二爲賓客三爲充君之庖

夏天王使宰渠伯糾來聘

五年春正月甲戌巳丑陳侯鮑卒

鮑卒何爲以一日卒之春秋之義信以傳信疑以傳疑陳侯以甲戌之日出巳丑之日得不知死之日故舉二日以包也

夏齊侯鄭伯如紀

天王使任叔之子來聘

任叔之子者錄父以使子也故微其君臣而著其父子不正父在子代使之辭也

葬陳桓公

城祝丘

秋蔡人衛人陳人從王伐鄭

舉從者之辭也其舉從者之辭何也爲天王諱伐鄭也鄭同姓之國也在乎冀州於是乎不服爲天子

病矣

大雩

螽

螽蟲災也甚則月不甚則時

冬州公如曹

外相如不書此其書何也過我也

六年春正月寔來

寔來者是來也何謂是來謂州公也其謂之是來何也以其畫我故簡言之也諸侯不以過相朝也

夏四月公會紀侯于郕

秋八月壬午大閱

大閱者何閱兵車也脩教明諭國道也平而脩戎事非正也其日以爲崇武故謹而日之蓋以觀婦人也

蔡人殺陳佗

陳佗者陳君也其曰陳佗何也匹夫行故匹夫稱之也其匹夫行奈何陳侯熹獵淫獵于蔡與蔡人爭禽蔡人不知其是陳君也而殺之何以知其是

孫鐘曰俱
同公羊

陳君也兩下相殺不道其不地於蔡也

九月丁卯子同生

疑故志之時曰同乎人也

冬紀侯來朝

七年春二月己亥焚咸丘

其不言邾咸丘何也疾其以火攻也

夏穀伯綏來朝

鄧侯吾離來朝

其名何也失國也失國則其以朝言之何也嘗以

諸侯與之接矣雖失國弗損吾異日也

八年春正月己卯烝

烝冬事也春興之志不時也

天王使冢父來聘

夏五月丁丑烝

烝冬事也春夏興之黷祀也志不敬也

秋伐邾

冬十月雨雪

祭公來遂逆王后于紀

其不言使焉何也不正其以宗廟之大事即謀於我故弗與使也遂繼事之辭也其曰遂逆王后故略之也或曰天子無外王命之則成矣

九年春紀季姜歸于京師

爲之中者歸之也

夏四月

秋七月

冬曹伯使其世子射姑來朝

朝不言使言使非正也使世子伉諸侯之禮而來

朝曹伯失正矣諸侯相見曰朝以待人父之道待人之子以內爲失正矣內失正曹伯失正世子可以已矣則是故命也尸子曰夫已多乎道句勁異甚

十年春王正月庚申曹伯終生卒

桓無王其曰王何也正終生之卒也

夏五月葬曹桓公

秋公會衛侯于挑丘弗遇

弗遇者志不相得也弗內辭也

冬十有二月丙午齊侯衛侯鄭伯來戰于郎

來戰者前定之戰也內不言戰言戰則敗也不言其人以吾敗也不言及者爲內諱也

十有一年春正月齊人衛人鄭人盟于惡曹

夏五月癸未鄭伯寤生卒

秋七月葬鄭莊公

九月宋人執鄭祭仲

宋人者宋公也其曰人何也貶之也

突歸于鄭

曰突賤之也曰歸易辭也祭仲易其事權在祭仲

也死君難臣道也今立惡而黜正惡祭仲也

鄭忽出奔衛

鄭忽者世子忽也其名失國也

柔會宋公陳侯蔡叔盟于折

柔者何吾大夫之未命者也

公會宋公于夫鍾

冬十有二月公會宋公于闕

十有二年春正月

夏六月壬寅公會杞侯莒子盟于曲池

秋七月丁亥公會宋公燕人盟于穀丘。

八月壬辰陳侯躍卒。

公會宋公于虛。

冬十有一月公會宋公于龜。

丙戌公會鄭伯盟于武父。

丙戌衛侯晉卒。

再稱日決日義也。

十有二月及鄭師伐宋丁未戰于宋。

非與所與伐戰也不言與鄭戰恥不和也於伐與

戰敗也內諱收舉其可道者也。

十有三年春二月公會紀侯鄭伯巳巳及齊侯。

宋公衛侯燕人戰齊師宋師衛師燕師敗績。

其言及者由內及之也其曰戰者由外言之也戰

稱人敗稱師重衆也其不地於紀也。

三月葬衛宣公。

夏大水。

秋七月。

冬十月。

十有四年春正月公會鄭伯于曹

無冰

無冰時燠也

夏五

鄭伯使其弟禦來盟

諸侯之尊弟兄不得以屬通其弟云者以其來我舉其貴者也來盟前定也不日前定之盟不日孔子曰聽遠音者聞其疾而不聞其舒望遠者察其貌而不察其形立乎定哀以指隱桓隱桓之日遠

矣夏五傳疑也

秋八月壬申御廩災

乙亥嘗

御廩之災不志此其志何也以爲唯未易災之餘而嘗可也志不敬也天子親耕以共粢盛王后親蠶以共祭服國非無良農工女也以爲人之所盡事其祖禰不若以已所自親者何用見其未易災之餘而嘗也日甸粟而內之三宮三宮米而藏之御廩夫嘗必有兼甸之事焉壬申御廩災乙亥

御廩曰作

嘗以爲未易災之餘而嘗也

冬十有二月丁巳齊侯祿父卒

宋人以齊人蔡人衛人陳人伐鄭

以者不以者也民者君之本也使人以其死非正

也

十有五年春二月天王使冢父來求車

古者諸侯時獻于天子以其國之所有故有辭讓

而無徵求求車非禮也求金甚矣

三月乙未天王崩

夏四月己巳葬齊僖公

五月鄭伯突出奔蔡

譏奪正也

鄭世子忽復歸于鄭

反正也

許叔入于許

許叔許之貴者也莫宜乎許叔其日入何也其歸

之道非所以歸也

公會齊侯于艾

孫鑿曰一
二句中自
其若致

齊人牟人葛人來朝

秋九月鄭伯突入于櫟

冬十有一月公會宋公衛侯陳侯于袤伐鄭
地而後伐疑辭也非其疑也

十有六年春正月公會宋公蔡侯衛侯于曹

夏四月公會宋公衛侯陳侯蔡侯伐鄭

秋七月公至自伐鄭

桓無會其致何也危之也

冬城向

十有一月衛侯朔出奔齊

朔之名惡也天子召而不往也

十有七年春正月丙辰公會齊侯紀侯盟于黃

二月丙午公會邾儀父盟于越

夏五月丙午及齊師戰于奚

內諱敗舉其可道者也不言其人以吾敗也不言
及之者爲內諱也

六月丁丑蔡侯封人卒

秋八月蔡季自陳歸于蔡

蔡季蔡之貴者也自陳陳有奉焉爾

癸巳葬蔡桓侯

及宋人衛人伐邾

冬十月朔日有食之

言朔不言日食既朔也

十有八年春王正月公會齊侯于濼

公與夫人姜氏遂如齊

濼之會不言及夫人何也以夫人之仇弗稱數也

夏四月丙子公薨于齊

其地於外也薨稱公舉上也

丁酉公之喪至自齊

秋七月

冬十有二月巳丑葬我君桓公

葬我君接上下也君弑賊不討不書葬此其言葬

何也不責踰國而討于是也桓公葬而後舉謚謚

所以成德也於卒事乎加之矣知者慮義者行仁

者守有此三者備然後可以會矣

穀梁傳卷二終

標錄自俱
前公羊

穀梁傳卷三

莊公

元年春王正月

繼弒君不言卽位正也繼弒君不言卽位之爲正何也曰先君不以其道終則子不忍卽位也

三月夫人孫于齊

孫之爲言猶孫也諱奔也接練時錄母之變始人之也○不言氏姓貶之也人之於天也○以道受命於人也○以言受命不若於道者○天絕之也○不若於言

謂夫人先在齊至練時始錄之然恐是隨喪歸此後孫耳

者人絕之也。臣子大受命。

夏單伯逆王姬

單伯者何。吾大夫之命乎。天子者也。命大夫故不名也。其不言如何也。其義不可受於京師也。其義不可受於京師何也。曰躬君弑於齊。使之主婚姻。與齊為禮。其義固不可受也。

秋築王姬之館于外

築禮也。于外非禮也。築之為禮何也。主王姬者必自公門出於廟則已。尊於寢則已。卑為之築節。

張榜曰區
所精嚴而

文

築之外變之正也。築之外變之為正何也。仇讐之人非所以接婚姻也。衰麻非所以接奔冕也。其不言齊侯之來逆何也。不使齊侯得與吾為禮也。

冬十月乙亥陳侯林卒

諸侯日卒正也

王使榮叔來錫桓公命

禮有受命無來錫命。錫命非正也。生服之死行之禮也。生不服死追錫之不正甚矣。

王姬歸于齊

為之中者歸之地

齊師遷紀邢鄆鄆

紀國也邢鄆鄆也或曰遷紀于邢鄆鄆

二年春王二月葬陳莊公

夏公子慶父帥師伐於餘丘

國而曰伐於餘丘邾之邑也其曰伐何也公子貴

矣師重矣而敵人之邑公子病矣病公子所以譏

乎公也其一曰君在而重之也

秋七月齊王姬卒

為之主者卒之也

冬十有二月夫人姜氏會齊侯于禚

婦人既嫁不踰竟踰竟非正也婦人不言會言會

非正也饗甚矣

乙酉宋公馮卒

三年春王正月溺會齊師伐衛

溺者何也公子溺也其不稱公子何也惡其會仇

讐而伐同姓故貶而名之也

夏四月葬宋莊公

張榜曰透
逸英勳

月葬故也

五月葬桓王

傳曰改葬也改葬之禮總舉下緬也或曰郤尸以
 求諸侯天子志崩不志葬必其時也何必焉舉天
 下而葬一人其義不疑也志葬故也危不得葬也
 曰近不失崩不志崩失天下也獨陰不生獨陽不
 生獨天不生三合然後生故曰母之子也可天之
 子也可尊者取尊稱焉卑者取卑稱焉其曰王者
 民之所歸往也

秋紀季以鄫入于齊

鄫紀之邑也入于齊者以鄫事齊也入者內弗受
 也

冬公次于滑

次止也有畏也欲救紀而不能也

四年春王二月夫人姜氏饗齊侯于祝丘

饗甚矣饗齊侯所以病齊侯也

三月紀伯姬卒

外夫人不卒此其言卒何也吾女也適諸侯則尊

同以吾為之變卒之也

夏齊侯陳侯鄭伯遇于垂

紀侯大去其國

大去者不遺一人之辭也言民之從者四年而後

畢也紀侯賢而齊侯滅之不言滅而曰大去其國

者不使小人加乎君子

六月乙丑齊侯葬紀伯姬

外夫人不書葬此其書葬何也吾女也失國故隱

而葬之

秋七月

冬公及齊人狩于郕

齊人者齊侯也其曰人何也卑公之敵所以卑公

也何為卑公也不復讐而怨不釋刺釋怨也

五年春王正月

夏夫人姜氏如齊師

師而曰如眾也婦人既嫁不踰竟踰竟非禮也

秋鄭黎來來朝

鄭國也黎來微國之君未爵命者也

冬公會齊人宋人陳人蔡人伐衛

是齊侯宋公也其曰人何也人諸侯所以人公也

其人公何也逆天王之命也

六年春王三月王人子突救衛

王人卑者也稱名貴之也善救衛也救者善則伐

者不正矣

夏六月衛侯朔入于衛

其不言伐衛納朔何也不逆天王之命也入者內

弗受也何用弗受也為以王命絕之也朔之名惡

也朔入逆則出順矣朔出入名以王命絕之也

秋公至自伐衛

惡事不致此其致何也不致則無用見公之惡事

之成也

螟

冬齊人求歸衛寶

以齊首之分惡於齊也使之如下齊而來我然惡

戰則殺矣

七年春夫人姜氏會齊侯于防

婦人不會會非正也

夏四月辛卯夜恒星不見

以見也
恒星者經星也日入至於星出謂之昔不見者可

夜中星隕如雨

其隕也如雨是夜中與春秋著以傳著疑以傳疑
中之幾也而曰夜中者著焉爾何用見其中也失
變而錄其時則夜中矣其不曰恒星之隕何也我
知恒星之不見而不知其隕也我見其隕而接於

張榜曰新
異

張榜曰音
篇

地者則是雨說也著於上見於下謂之雨著于下
不見於上謂之隕豈雨說哉

秋大水

高下有水災曰大水

無麥苗

麥苗同時也

冬夫人姜氏會齊侯于穀

婦人不會會非正也

八年春王正月師次于郎以俟陳人蔡人

次止也侯待也

甲午治兵

出日治兵習戰也入日振旅習戰也治兵而陳蔡
不至矣兵事以嚴終故日善陳者不戰此之謂也
善為國者不師善師者不陳善陳者不戰善戰者
不死善死者不亡

夏師及齊師圍邾邾降于齊師

其日降于齊師何不使齊師加威於邾也

秋師還

還者事未畢也遯也

冬十有一月癸未齊無知弒其君諸兒

大夫弒其君以國氏者嫌也弒而代之也

九年春齊人殺無知

無知之挈失嫌也稱人以殺大夫殺有罪也

公及齊大夫盟于莒

公不及大夫大夫不名無君也盟納子糾也不日

其盟淪也當齊無君制在公矣當可納而不納故

惡內也

孫鑿曰精

語他子書

得此便是

徐夫人之

心

夏公伐齊納糾

當可納而不納齊變而後伐故乾時之戰不諱敗惡內也

齊小白入于齊

大夫出奔反以好日歸以惡日入齊公孫無知弑襄公公子糾公子小白不能存出亡齊人殺無知而迎公子糾於魯公子小白不讓公子糾先入又殺之于魯故曰齊小白入于齊惡之也

秋七月丁酉葬齊襄公

八月庚申及齊師戰于乾時我師敗績

九月齊人取子糾殺之

外不言取言取病內也取易辭也猶曰取其子糾而殺之云爾十室之邑可以逃難百室之邑可以隱死以千乘之魯而不能存子糾以公為病矣

冬浚洙

浚洙者深洙也著力不足也

十年春王正月公敗齊師于長勺

不日疑戰也疑戰而曰敗勝內也

張榜曰此與鄭伯克段同一句法而得趣各別

二月公侵宋

侵時此其月何也乃深其怨於齊又退侵宋以衆其敵惡之故謹而月之

三月宋人遷宿

遷亡辭也其不地宿不復見也遷者猶未失其國家以往者也

夏六月齊師宋師次于郎

次止也畏我也

公敗宋師于乘丘

不日疑戰也疑戰而曰敗勝內也

秋九月荆敗蔡師于莘以蔡侯獻武歸

荆者楚也何為謂之荆狄之也何為狄之聖人立必後至天子弱必先叛故曰荆狄之也蔡侯何以名也絕之也何為絕之獲也中國不言敗此其言敗何也中國不言敗蔡侯其見獲乎其言敗何也釋蔡侯之獲也以歸猶愈乎執也

冬十月齊師滅譚譚子奔莒

十有一年春王正月

夏五月戊寅公敗宋師于鄆

內事不言戰舉其大者其日成敗之也宋萬之獲也

秋宋大水

外災不書此何以書王者之後也高下有水災曰大水

冬王姬歸于齊

其志過我也

十有二年春王三月紀叔姬歸于鄆

國而曰歸此邑也其曰歸何也吾女也失國喜得其所故言歸焉爾

夏四月

秋八月甲午宋萬弑其君捷

宋萬宋之卑者也卑者以國氏及其大夫仇牧

以尊及卑也仇牧閑也

冬十月宋萬出奔陳

十有三年春齊人宋人陳人蔡人邾人會于北杏

張樹曰此
與幽之盟
謂呼應

是齊侯宋公也其曰人何也始疑之何疑焉桓非
受命之伯也將以事授之者也曰可矣乎未乎舉
人衆之辭也

夏六月齊人滅遂

遂國也其不日微國也

秋七月

冬公會齊侯盟于柯

曹劌之盟也信齊侯也桓盟雖內與不日信也

十有四年春齊人陳人曹人伐宋

夏單伯會伐宋

會事之成也

秋七月荆入蔡

荆者楚也其曰荆何也州舉之也州不如國國不

如名名不如字

冬單伯會齊侯宋公衛侯鄭伯于郵

復同會也

十有五年春齊侯宋公陳侯衛侯鄭伯會于郵

復同會也

孫鑛曰字
字茶鍊

夏夫人姜氏如齊

婦人既嫁不踰竟踰竟非禮也

秋宋人齊人邾人伐鄭

鄭人侵宋

冬十月

十有六年春王正月

夏宋人齊人衛人伐鄭

秋荆伐鄭

冬十有二月會齊侯宋公陳侯衛侯鄭伯許男曹伯

滑伯滕子同盟于幽

同者有同也同尊周也不言公外內察一疑之也

邾子克卒

其日子進之也

十有七年春齊人執鄭詹

人者衆辭也以人執與之辭也鄭詹鄭之卑者卑

者不志此其志何也以其逃來志之也逃來則何

志焉將有其末不得不錄其本也鄭詹鄭之佞人

也

夏齊人殲于遂

殲者盡也然則何為不言遂人盡齊人也無遂之辭也無遂則何為言遂其猶存遂也存遂奈何曰齊人滅遂使人戍之遂之因氏飲戍者酒而殺之齊人殲焉此謂狎敵也

秋鄭詹自齊逃來

逃義曰逃

冬多麋

十有八年春王三月日有食之

張務曰曆法無夜食故錄以傳

不言日不言朔夜食也何以知其夜食也曰王者朝日故雖為天子必有尊也貴為諸侯必有長也故天子朝日諸侯朝朔

夏公追戎于濟西

其不言戎之伐我何也以公之追之不使戎邇於我也于濟西者大之也何大焉為公之追之也

秋有蜚

一有一亡曰有蜚射人者也

冬十月

十有九年春王正月

夏四月

秋公子結媵陳人之婦于鄆遂及齊侯宋公盟

媵淺事也不志此其志何也辟要盟也何以見其

辟要盟也媵禮之輕者也盟國之重也以輕事遂

乎國重無說其曰陳人之婦略之也其不日數渝

惡之也

夫人姜氏如莒

婦人既嫁不踰竟踰竟非正也

冬齊人宋人陳人伐我西鄙

其曰鄙遠之也其遠之何也不以難邇我國也

二十年春王二月夫人姜氏如莒

婦人既嫁不踰竟踰竟非正也

夏齊大災

其志以甚也

秋七月

冬齊人伐我

二十有一年春王正月

夏五月辛酉鄭伯突卒

秋七月戊戌夫人姜氏薨

婦人弗日也

冬十有二月葬鄭厲公

二十有二年春王正月肆大眚

肆失也眚災也災紀也失故也為嫌天子之葬也

癸丑葬我小君文姜

小君非君也其曰君何也以其為公配可以言小

君也

陳人殺其公子禦寇

言公子而不言大夫公子未命為大夫也其曰公

子何也公子之重視大夫命以執公子

夏五月

秋七月丙申及齊高傒盟于防

不言公高傒仇也

冬公如齊納幣

納幣大夫之事也禮有納采有問名有納徵有告

期四者備而後娶禮也公之親納幣非禮也故譏

之

二十有三年春公至自齊

祭叔來聘

其不言使何也天子之內臣也不正其外交故不

與使也

夏公如齊觀社

常事曰視非常曰觀觀無事之辭也以是為尸女

也無事不出竟

公至自齊

公如往時正也致月故也如往月致月有懼焉爾

荆人來聘

善累而後進之其曰人何也舉道不待再

公及齊侯遇于穀

及者內為志焉爾遇者志相得也

蕭叔朝公

微國之君未爵命者其不言來於外也朝於廟正

也於外非正也

秋丹桓宮楹

禮天子諸侯黝聖大夫倉士黻丹楹非禮也

冬十有一月曹伯射姑卒

十有二月甲寅公會齊侯盟于扈

二十有四年春王三月刻桓宮楹

孫鑛曰得引語陪說

慙自農

禮天子之楹斲之斲之加密石焉諸侯之楹斲之斲之大夫斲之士斲本刻楹非正也夫人所以崇宗廟也取非禮與非正而加之於宗廟以飾夫人非正也刻桓宮楹丹桓宮楹斥言桓宮以惡莊也

葬曹莊公

夏公如齊逆女

親迎恒事也不志此其志何也不正其親迎於齊也

秋公至自齊

迎者行見諸舍見諸先至非正也

八月丁丑夫人姜氏入

入者內弗受也日入惡入者何用不受也以宗廟弗受也其以宗廟弗受何也娶仇人子弟以薦舍於前其義不可受也

戊寅大夫宗婦覲用幣

覲見也禮大夫不見夫人不言及不正其行婦道故列數之也男子之贄羔鴈雉脰婦人之贄棗栗鍛脩用幣非禮也用者不宜用者也大夫國體也而行婦道惡之故謹而日之也

大水

冬戎侵曹曹羈出奔陳赤歸于曹郭公

赤蓋郭公也何為名也禮諸侯無外歸之義外歸

非正也 此事二傳俱誤

二十有五年春陳侯使女叔來聘

其不名何也天子之命大夫也

夏五月癸丑衛侯朔卒

六月辛未朔日有食之

言日言朔食正朔也

鼓用牲于社

鼓禮也用牲非禮也天子救日置五麾陳五兵五

鼓諸侯置三麾陳三鼓三兵大夫擊門士擊柝言

克其陽也

孫鑿曰極似左氏外傳語

伯姬歸于杞

其不言逆何也逆之道微無足道焉爾

秋大水鼓用牲于社于門

高下有水災曰大水既戒鼓而驟衆用牲可以已矣救日以鼓兵救水以鼓衆

冬公于友如陳

二十有六年春公伐戎

夏公至自伐戎

曹殺其大夫

言大夫而不稱名姓無命大夫也無命大夫而曰大夫賢也為曹羈崇也

秋公會宋人齊人伐徐

冬十有二月癸亥朔日有食之

二十有七年春公會杞伯姬于洮

夏六月公會齊侯宋公陳侯鄭伯同盟于幽

同者有同也同尊周也於是而後授之諸侯也其授之諸侯何也齊侯得衆也桓會不致安之也桓盟不日信之也信其信仁其仁衣裳之會十有一

未嘗有歃血之盟也信厚也兵車之會四未嘗有
大戰也愛民也

秋公子友如陳葬原仲

言葬不言卒不葬者也不葬而曰葬諱出奔也

冬杞伯姬來

莒慶來逆叔姬

諸侯之嫁子於大夫主大夫以與之來者接內也
不正其接內故不與夫婦之稱也

杞伯來朝

公會齊侯于城濮

二十有八年春王三月甲寅齊人伐衛衛人及齊人

戰衛人敗績

於伐與戰安戰也戰衛戰則是師也其曰人何也
微之也何爲微之也今授之諸侯而後有侵伐之
事故微之也其人衛何也以其人齊不可不人衛
也衛小齊大其以衛及之何也以其微之可以言
及也其稱人以敗何也不以師敗於人也

夏四月丁未邾子瑱卒

秋荆伐鄭

荆者楚也其曰荆州舉之也

公會齊人宋人救鄭

善救鄭也

冬築微

山林藪澤之利所以與民共也虞之非正也

大無麥禾

大者有顧之辭也於無禾及無麥也

臧孫辰告糴于齊

國無三年之畜曰國非其國也一年不升告糴諸侯告請也糴糴也不正故舉臧孫辰以爲私行也國無九年之蓄曰不足無六年之畜曰急無三年之畜曰國非其國也諸侯無粟諸侯相歸粟正也臧孫辰告糴于齊告然後與之言內之無外交也古者稅什一豐年補敗不外求而上下皆足也雖累凶年民弗病也一年不艾而百姓饑君子非之不言如爲內諱也

二十有九年春新延廡

延廢者法廢也其言新有故也有故則何爲書也
古之君人者必時視民之所勤民勤於力則功築
罕民勤於財則貢賦少民勤於食則百事廢矣冬
築微春新延廢以其用民力爲已悉矣

夏鄭人侵許

秋有蜚

一有一亡日有

冬十有二月紀叔姬卒

城諸及防

可城也以大及小也

三十年春王正月

夏師次于成

次止也有畏也欲救鄆而不能也不言公恥不能
救鄆也

秋七月齊人降鄆

降猶下也鄆紀之遺邑也

八月癸亥葬紀叔姬

不曰卒而曰葬閔紀之亡也

九月庚午朔日有食之鼓用牲于社
冬公及齊侯遇于魯濟

及者內為志焉爾遇者志相得也

齊人伐山戎

齊人者齊侯也其曰人何也愛齊侯乎山戎也其
愛之何也桓內無因國外無從諸侯而越千里之
險北伐山戎危之也則非之乎善之也何善乎爾
燕周之分子也貢職不至山戎為之伐矣

二十有一年春築臺于郎

夏四月薛伯卒

築臺于薛

六月齊侯來獻戎捷

齊侯來獻捷者內齊侯也不言使內與同不言使
也獻戎捷軍得日捷戎菽也

秋築臺于秦

不正罷民三時虞山林藪澤之利且財盡則怨力
盡則懟君子危之故謹而志之也或曰倚諸桓也
桓外無諸侯之變內無國事越千里之險北伐山

戎為燕辟地魯外無諸侯之變內無國事一年罷
民三時虞山林藪澤之利惡內也

冬不雨

三十有二年春城小穀

夏宋公齊侯遇于梁丘

遇者志相得也梁丘在曹邾之間去齊八百里非
不能從諸侯而往也辭所遇遇所不遇大齊桓也

秋七月癸巳公子牙卒

八月癸亥公薨于路寢

路寢正寢也寢疾居正寢正也男子不絕于婦人
之手以齊終也

冬十月巳未子般卒

子卒日正也不日故也有所見則日

公子慶父如齊

此奔也其日如何也諱莫如深深則隱苟有所見
莫如深也

狄伐邢

穀梁傳卷三終

穀梁傳

卷三

穀梁傳卷三終

穀梁傳卷四

莊公

美

[Faint bleed-through text from the reverse side of the page]

穀梁傳卷四

閔公

元年春王正月

繼弒君不言即位正也親之非父也尊之非君也
繼之如君父也者受國焉爾

齊人救邢

善救邢也

夏六月辛酉葬我君莊公

莊公葬而後舉謚謚所以成德也於卒事乎加之

矣

秋八月公及齊侯盟于洛姑

盟納季子也

季子來歸

其曰季子貴之也其曰來歸喜之也

冬齊仲孫來

其曰齊仲孫外之也其不目而曰仲孫疏之也其

言齊以累桓也

二年春王正月齊人遷陽

夏五月乙酉吉禘于莊公

吉禘者不吉者也喪事未畢而舉吉祭故非之也

秋八月辛丑公薨

不地故也其不書葬不以討母葬子也

九月夫人姜氏孫于邾

孫之為言猶孫也諱奔也

公子慶父出奔莒

其曰出絕之也慶父不復見矣

冬齊高子來盟

孫鑿曰何
自悠揚婉
宕正不在
多

其曰來喜之也其曰高子貴之也盟立僖公也不
言使何也不以齊侯使高子也

十有二月狄入衛

鄭棄其師

惡其長也兼不反其眾則是棄其師也

穀梁傳卷四終

穀梁傳卷五

僖公

元年春王正月

繼弒君不言即位正也

齊師宋師曹師次于聶北救邢

救不言次言次非救也非救而曰救何也遂齊侯

之意也是齊侯與齊侯也何用見其是齊侯也曹

無師曹師者曹伯也其不言曹伯何也以其不言

齊侯不可言曹伯也其不言齊侯何也以其不足

孫鑄曰死
折之趨濫
行官郊

乎揚不言齊侯也

夏六月邢遷于夷儀

遷者猶得其國家以往者也其地邢復見也

齊師宋師曹師城邢

是向之師也使之如改事然美齊侯之功也

秋七月戊辰夫人姜氏薨于夷

夫人薨不地地故也

齊人以歸

不言以喪歸非以喪歸也加喪焉諱以夫人歸也

其以歸薨之也

楚人伐鄭

八月公會齊侯宋公鄭伯曹伯邾人于榿

九月公敗邾師于偃

不日疑戰也疑戰而曰敗勝內也

冬十月壬午公子友帥師敗莒師于麗獲莒挈

莒無大夫其曰莒挈何也以吾獲之目之也內不

言獲此其言獲何也惡公子之給給者柰何公子

友謂莒挈曰吾二人不相說士卒何罪屏左右而

臣曰負劍
尤景正似
張榜曰棄
師言欺一
而衆疑

相搏公子友處下左右曰孟勞孟勞者魯之寶刀也公子友以殺之然則何以惡乎給也曰棄師之道也

十有二月丁巳夫人氏之喪至自齊

其不言姜以其殺二子貶之也或曰爲齊桓諱殺同姓也

二年春王正月城楚丘

楚丘者何衛邑也國而曰城此邑也其曰城何也封衛也則其不言城衛何也衛未遷也其不言衛

之遷焉何也不與齊侯專封也其言城之者專封也故非天子不得專封諸侯諸侯不得專封諸侯雖通其仁以義而不與也故曰仁不勝道

夏五月辛巳葬我小君哀姜

虞師晉師滅夏陽

非國而曰滅重夏陽也虞無師其曰師何也以其先晉不可以不言師也其先晉何也爲主乎滅夏陽也夏陽者虞虢之塞邑也滅夏陽而虞虢舉矣虞之爲主乎滅夏陽何也晉獻公欲伐虢荀息曰

張栻曰深
入人情

君何不以屈產之乘垂棘之璧而借道乎虞也公
曰此晉國之寶也如受吾幣而不借吾道則如之
何荀息曰此小國之所以事大國也彼不借吾道
必不敢受吾幣如受吾幣而借吾道則是我取之
中府而藏之外府取之中廐而置之外廐也公曰
宮之奇存焉必不使受之也荀息曰宮之奇之爲
人也達心而懦又少長於君達心則其言略懦則
不能彊諫少長於君則君輕之且夫玩好在耳目
之前而患在一國之後此中知以上乃能慮之臣

張栻曰甚
有分寸

料虞君中知以下也公遂借道而伐虢宮之奇諫
曰晉國之使者其辭卑而幣重必不便於虞虞公
弗聽遂受其幣而借之道宮之奇諫曰語曰唇亡
則齒寒其斯之謂與挈其妻子以奔曹獻公亡虢
五年而後舉虞荀息牽馬操璧而前曰璧則猶是
也而馬齒加長矣

孫鑛曰此
語載左史
公穀數變
不有佳

秋九月齊侯宋公江人黃人盟于貫

貫之盟不期而至者江人黃人也江人黃人者遠
國之辭也中國稱齊宋遠國稱江黃以爲諸侯皆

來至也

冬十月不雨

不雨者勤雨也

楚人侵鄭

三年春王正月不雨

不雨者勤雨也

夏四月不雨

一時言不雨者閔雨也閔雨者有志乎民者也

徐人取舒

張榜曰當

與文公二

年參看

張榜曰喜
雨亭本此

張榜曰整
峻

六月雨

雨云者喜雨也喜雨者有志乎民者也

秋齊侯宋公江人黃人會于陽穀

陽穀之會相公委端搢笏而朝諸侯諸侯皆諭乎

相公之志 屹然有宗

冬公子季友如齊蒞盟

蒞者位也其不日前定也不言及者以國與之也
不言其人亦以國與之也

楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰

潰之為言上下不相得也侵淺事也侵蔡而蔡潰以桓公為知所侵也不土其地不分其民明正也遂伐楚次于陔

遂繼事也次止也

夏許男新臣卒

諸侯死於國不地死於外地死於師何為不地內桓師也

楚屈完來盟于師盟于召陵

楚無大夫其曰屈完何也以其來會桓成之為大夫也其不言使權在屈完也則是正乎曰非正也以其來會諸侯重之也來者何內桓師也于師前定也于召陵得志乎桓公也得志者不得志也以桓公得志為僅矣屈完曰大國之以兵向楚何也桓公曰昭王南征不反菁茅之貢不至故周室不祭屈完曰菁茅之貢不至則諾昭王南征不反我將問諸江

張栻曰後段矯矯不

受粘縛

齊人執陳轅濤塗

齊人者齊侯也其人之何也於是哆然外齊侯也
不正其踰國而執也

秋及江人黃人伐陳

不言其人及之者何內師也

八月公至自伐楚

有二事偶則以後事致後事小則以先事致其以
伐楚致大伐楚也

葬許穆公

冬十有二月公孫茲帥師會齊人宋人衛人鄭人許
人曹人侵陳

五年春晉侯殺其世子申生

目晉侯斥殺惡晉侯也

杞伯姬來朝其子

婦人既嫁不踰竟踰竟非正也諸侯相見曰朝伯
姬爲志乎朝其子也伯姬爲志乎朝其子則是杞
伯失夫之道矣諸侯相見曰朝以待人父之道待
人之子非正也故曰杞伯姬來朝其子參譏也

夏公孫茲如牟

公及齊侯宋公陳侯衛侯鄭伯許男曹伯會王世子于首戴

及以會尊之也何尊焉王世子云者唯王之貳也云可以重之存焉尊之也何重焉天子世子世天下也

秋八月諸侯盟于首戴

無中事而復舉諸侯何也尊王世子而不敢與盟也尊則其不敢與盟何也盟者不相信也故謹信

張栻曰此傳亮意發

也不敢以所不信而加之尊者桓諸侯也不能朝

天子是不臣也王世子子也塊然受諸侯之尊已

而立乎其位是不子也桓不臣王世子不子則其

所善焉何也是則變之正也天子微諸侯不享覲

桓控大國扶小國統諸侯不能以朝天子亦不敢

致天王尊王世子于首戴乃所以尊天王之命也

世子含王命會齊桓亦所以尊天王之命也世子

受之可乎是亦變之正也天子微諸侯不享覲世

子受諸侯之尊已而天王尊矣世子受之可也

鄭伯逃歸不盟

以其去諸侯故逃之也

楚人滅弦弦子奔黃

弦國也其不日微國也

九月戊申朔日有食之

冬晉人執虞公

執不言所於地緼於晉也其曰公何也猶曰其下
執之之辭也其猶下執之之辭何也晉命行乎虞
民矣虞虢之相救非相為賜也今日亡虢而明日

亡虞矣

六年春王正月

夏公會齊侯宋公陳侯衛侯曹伯伐鄭圍新城

伐國不言圍邑此其言圍何也病鄭也著鄭伯之
罪也

秋楚人圍許諸侯遂救許

善救許也

冬公至自伐鄭

其不以救許致何也大伐鄭也

七年春齊人伐鄭

夏小邾子來朝

鄭殺其大夫申侯

稱國以殺大夫殺無罪也

秋七月公會齊侯宋公陳世子款鄭世子華盟于寧

母

衣裳之會也

曹伯班卒

公子友如齊

冬葬曹昭公

八年春王正月公會王人齊侯宋公衛侯許男曹伯

陳世子款盟于洮

王人之先諸侯何也貴王命也朝服雖敝必加於

上弁冕雖舊必加於首周室雖衰必先諸侯兵車

之會也

鄭伯乞盟

以向之逃歸乞之也乞者重辭也重是盟也乞者

處其所而請與也蓋洵之也

夏狄伐晉

秋七月禘于太廟用致夫人

用者不宜用者也致者不宜致者也言夫人必以其氏姓言夫人而不以氏姓非夫人也立妾之辭也非正也夫人之我可以不夫人之乎夫人卒葬之我可以不卒葬之乎一則以宗廟臨之而後貶焉一則以外之弗夫人而見正焉

冬十有二月丁未天王崩

九年春王三月丁丑宋公禦說卒

夏公會宰周公齊侯宋子衛侯鄭伯許男曹伯于葵

丘

天子之宰通于四海宋其稱子何也未葬之辭也禮柩在堂上孤無外事今背殯而出會以宋子爲無哀矣

秋七月乙酉伯姬卒

內女也未適人不卒此何以卒也許嫁筭而字之死則以成人之喪治之

九月戊辰諸侯盟于葵丘

桓盟不日此何以日美之也為見天子之禁故備
之也葵丘之盟陳牲而不殺讀書加于牲上壹明
天子之禁曰毋雍泉毋訖糴毋易樹子毋以妾為
妻毋使婦人與國事

甲子晉侯佹諸卒

冬晉里克殺其君之子奚齊

其君之子云者國人不子也國人不子何也不正
其殺世子申生而立之也

十年春王正月公如齊

秋滅溫溫子奔衛

晉里克弑其君卓及其大夫荀息
以尊及卑也荀息閑也

夏齊侯許男伐北戎

晉殺其大夫里克

稱國以殺罪累上也里克弑二君與一大夫其以
累上之辭言之何也其殺之不以其罪也其殺之
不以其罪奈何里克所為弑者為重耳也夷吾曰
是又將殺我乎故殺之不以其罪也其為重耳弑

張栻曰此
傳大勝公
左

奈何晉獻公伐虢得麗姬獻公私之有二子長曰
奚齊稚曰卓子麗姬欲爲亂故謂君曰吾夜者夢
夫人趨而來曰吾若畏胡不使大夫將衛士而衛
冢乎公曰孰可使曰臣莫尊於世子則世子可故
君謂世子曰麗姬夢夫人趨而來曰吾苦畏女其
將衛士而往衛冢乎世子曰敬諾築宮宮成麗姬
又曰吾夜者夢夫人趨而來曰吾苦饑世子之宮
已成則何爲不使祠也故獻公謂世子曰其祠世
子祠已祠致福於君君田而不在麗姬以醜爲酒

藥脯以毒獻公田來麗姬曰世子已祠故致福於

君君將食麗姬跪曰食自外來者不可不試也覆

酒於地而地墳以脯與犬犬死麗姬下堂而啼呼

曰天乎天乎國子之國也子何遲於爲君君喟然

歎曰吾與女未有過切是何與我之深也使人謂

世子曰爾其圖之世子之傅里克謂世子曰入自

明入自明則可以生不入自明則不可以生世子

曰吾君已老矣已昏矣吾若此而入自明則麗姬

必死麗姬死則吾君不安所以使吾君不安者吾

張榜曰一
忙忙迫迫
一忿忿憤
憤描景如
睹

張榜曰即
疊前語作
收而意自
有餘

不若自死吾寧自殺以安吾君以重耳為寄矣列
脰而死故里克所為弑者為重耳也夷吾曰是又
將殺我也

秋七月

冬大雨雪

十有一年春晉殺其大夫丕鄭父

稱國以殺罪累上也

夏公及夫人姜氏會齊侯于陽穀

秋八月大雩

雩月正也雩得雨曰雩不得雨曰旱

冬楚人伐黃

十有二年春王正月庚午日有食之

夏楚人滅黃

貫之盟管仲曰江黃遠齊而近楚楚為利之國也
若伐而不能救則無以宗諸侯矣桓公不聽遂與
之盟管仲死楚伐江滅黃桓公不能救故君子閔
之也

秋七月

張榜曰君
于江黃之
滅備焉蓋
以重管子
之遠圖也

殺梁

卷五

七

冬十有二月丁丑陳侯杵臼卒

十有三年春秋侵衛

夏四月葬陳宣公

公會齊侯宋公陳侯衛侯鄭伯許男曹伯于鹹

兵車之會也

秋九月大雩

冬公子友如齊

十有四年春諸侯城緣林

其日諸侯散辭也聚而曰散何也諸侯城有散辭

孫儀曰家
數語使

也桓德衰矣

夏六月季姬及繒子遇于防使繒子來朝

遇者同謀也來朝者來請已也朝不言使言使非

正也以病繒子也

秋八月辛卯沙鹿崩

林屬於山為鹿沙山名也無崩道而崩故志之也

其日重其變也

狄侵鄭

冬蔡侯盼卒

大與在

諸侯時卒惡之也

十有五年春王正月公如齊

楚人伐徐

三月公會齊侯宋公陳侯衛侯鄭伯許男曹伯盟于
牡丘

兵車之會也

遂次于匡

遂繼事也次止也有畏也

公孫敖帥師及諸侯之大夫救徐

善救徐也

夏五月日有食之

秋七月齊師曹師伐厲

八月螽

螽蟲災也甚則月不甚則時

九月公至自會

季姬歸于緡

巳卯晦震夷伯之廟

晦冥也震雷也夷伯魯大夫也因此以見天子至

于士皆有廟天子七廟諸侯五大夫三士二故德
厚者流光○德薄者流里○是以貴始德之本也始封
必爲祖

冬宋人伐曹

楚人敗徐于婁林

夷狄相敗志也

十有一月壬戌晉侯及秦伯戰于韓獲晉侯

韓之戰晉侯失民矣以其民未敗而君獲也

十有六年春王正月戊申朔隕石于宋五

先隕而後石何也隕而後石也于宋四竟之內曰

宋後數散辭也耳治也

是月六鵙退飛過宋都

是月者決不日而月也六鵙退飛過宋都先數聚

辭也日治也于日石無知之物鵙微有知之物石

無知故日之鵙微有知之物故月之君子之於物

無所苟而已石鵙且猶盡其辭而况於人乎故五

石六鵙之辭不設則王道不亢矣民所聚曰都

三月壬申公子季友卒

曠揚曰日
治耳治新
主

大夫日卒正也稱公弟叔仲賢也大夫不言公子
公孫疏之也

夏四月丙申繒季姬卒

秋七月甲子公孫茲卒

大夫日卒正也

冬十有二月公會齊侯宋公陳侯衛侯鄭伯許男邢

侯曹伯于淮

兵車之會也

十有七年春齊人徐人伐英氏

夏滅項

孰滅之桓公也何以不言桓公也為賢者諱也項
國也不可滅而滅之乎桓公知項之可滅也而不
知已之不可以滅也既滅人之國矣何賢乎君子
惡惡疾其始善善樂其終桓公嘗有存亡繼絕之
功故君子為之諱也 與公事同

秋夫人姜氏會齊侯于卞

九月公至自會

冬十有二月乙亥齊侯小白卒

此不正其日之何也其不正前見矣其不正之前見何也以不正入虛國故稱嫌焉爾

十有八年春王正月宋公曹伯衛人邾人伐齊非代喪也

夏師救齊

善救齊也

五月戊寅宋師及齊師戰于獻齊師敗績

戰不言伐客不言及言及惡宋也

狄救齊

善救齊也

秋八月丁亥葬齊桓公

冬邾人狄人伐衛

狄其稱人何也善累而後進之伐衛所以救齊也功近而德遠矣

十有九年春王三月宋人執滕子嬰齊

夏六月宋公曹人邾人盟于曹南縉子會盟于邾已

西邾人執縉子用之

微國之君因邾以求與之盟人因已以求與之盟

孫鑪白造
句亦佳

已迎而執之惡之故謹而日之也用之者叩其鼻
以。鯀。社。也。

秋宋人圍曹

衛人伐邢

冬會陳人蔡人楚人鄭人盟于齊

梁亡

自亡也。酒於酒。滯於色。心昏耳目。塞上無正長之
治大臣背叛。民為寇盜。梁亡自亡也。如加力役焉。
酒不足道也。梁亡鄭棄其師。我無加損焉。正名而

已矣。梁亡出惡正也。鄭棄其師惡其長也。

二十年春新作南門

作為也有加其度也。言新有故也。非作也。南門者

法門也。

夏郟子來朝

五月乙巳西宮災

謂之新宮則近為禰宮以謚言之則如疏之然以
是為閔宮也。

鄭人入滑

秋齊人狄人盟于邢

邢為主焉爾邢小其為主何也其為主乎救齊

冬楚人伐隨

隨國也

二十有一年春狄侵衛

宋人齊人楚人盟于鹿上

夏大旱

旱時正也

秋宋公楚子陳侯蔡侯鄭伯許男曹伯會于孟執宋

公以伐宋

以重辭也

冬公伐邾

楚人使宜申來獻捷

捷軍得也其不曰宋捷何也不與楚捷於宋也

十有二月癸丑公會諸侯盟于薄

會者外為主焉爾

釋宋公

外釋不志此其志何也以公之與之盟日之也不

言楚不與楚專釋也

二十有二年春公伐邾取須句

夏宋公衛侯許男滕子伐鄭

秋八月丁未及邾人戰于升陘

內諱敗舉其可道者也不言其人以吾敗也不言及之者爲內諱也

冬十有一月己巳朔宋公及楚人戰于泓宋師敗績日事遇朔曰朔春秋三十有四戰未有以尊敗乎卑以師敗乎人則卑以師敗乎人者也

驕其敵襄公以師敗乎人而不驕其敵何也責之也泓之戰以爲復雩之耻也雩之耻宋襄公有以自取之伐齊之喪執滕子圍曹爲雩之會不顧其力之不足而致楚成王成王怒而執之故曰禮人而不荅則反其敬愛人而不親則反其仁治人而不治則反其知過而不改又之是謂之過襄公之謂也古者被甲嬰冑非以興國也則以征無道也豈曰以報其耻哉宋公與楚人戰于泓水之士司馬子反曰楚衆我少鼓險而擊之勝無幸焉襄公

曰君子不推人危不攻人厄須其出旣出旌亂於上陳亂於下子反曰楚衆我少擊之勝無幸焉襄公曰不鼓不成列須其成列而後擊之則衆敗而身傷焉七月而死倍則攻敵則戰少則守人之所以爲人者言也人而不能言何以爲人言之所以爲言也信也言而不信何以爲言信之所以爲信者道也信而不道何以爲道道之貴者時其行勢也

寬話少致

二十有三年春齊侯伐宋圍緡

伐國不言圍邑此其言圍何也不正其以惡報惡也

夏五月庚寅宋公茲父卒

茲父之不葬何也失民也其失民何也以其不教民戰則是棄其師也爲人君而棄其師其民孰以爲君哉

秋楚人伐陳

冬十有一月杞子卒

二十有四年春王正月

夏狄伐鄭

秋七月

冬天王出居于鄭

天子無出出失天下也居者居其所也雖失天下莫敢有也

晉侯夷吾卒

二十五年春王正月丙午衛侯燬滅邢

燬之名何也不正其伐本而滅同姓也

夏四月癸酉衛侯燬卒

宋蕩伯姬來逆婦

婦人既嫁不踰竟宋蕩伯姬來逆婦非正也其曰婦何也緣姑言之之辭

宋殺其大夫

其不稱名姓以其在祖之位尊之也

秋楚人圍陳納頓子于頓

納者內弗受也圍一事也納一事也而遂言之蓋納頓子者陳也

納頓子者豈陳哉

葬衛文公

冬十有二月癸亥公會衛子莒慶盟于洮

莒無大夫其曰莒慶何也以公之會目之也

二十有六年春王正月己未公會莒子衛甯速盟于

向

公不會大夫其曰甯速何也以其隨莒子可以言

會也

齊人侵我西鄙公追齊師至鄆弗及

人微者也侵淺事也公之追之非正也至鄆急辭

也弗及者弗與也可以及而不敢及也其侵也曰

人其追也曰師以公之弗及大之也弗及內辭也

夏齊人伐我北鄙

衛人伐齊

公子遂如楚乞師

乞重辭也何重焉重人之死也非所乞也師出不

必反戰不必勝故重之也

秋楚人滅夔以夔子歸

夔國也不日微國也以歸猶愈乎執也

冬楚人伐宋圍緡

穀梁傳 卷五
伐國不言圍邑此其言圍何也以吾用其師目其事也非道用師也

公以楚師伐齊取穀

以者不以者也民者君之本也使民以其死非其正也

公至自伐齊

惡事不致此其致之何也危之也

二十有七年春杞子來朝

夏六月庚寅齊侯昭卒

秋八月乙未葬齊孝公

乙巳公子遂帥師入杞

冬楚人陳侯蔡侯鄭伯許男圍宋

楚人者楚子也其曰人何也人楚子所以人諸侯也其人諸侯何也不正其信夷狄而伐中國也

十有二月甲戌公會諸侯盟于宋

二十有八年春晉侯侵曹晉侯伐衛

再稱晉侯忌也

公子買戍衛不卒戍刺之

先名後刺殺有罪也公子啓曰不卒戍者可以卒也
也可以卒而不卒譏在公子也刺之可也

楚人救衛

二月丙午晉侯入曹執曹伯畀宋人

入者內弗受也日入惡入者也以晉侯而斥執曹伯惡晉侯也畀與也其日人何也不以晉侯畀宋公也

夏四月己巳晉侯齊師宋師秦師及楚人戰于城濮
楚師敗績

楚殺其大夫得臣

衛侯出奔楚

五月癸丑公會晉侯齊侯宋公蔡侯鄭伯衛子莒子
盟于踐土

諱會天王也

陳侯如會

如會外乎會也於會受命也

公朝于王所

朝不言所言所者非其所也

六月衛侯鄭自楚復歸于衛

自楚楚有奉焉爾復者復中國也歸者歸其所也

鄭之名失國也

衛元咺出奔晉

陳侯款卒

秋杞伯姬來

公子遂如齊

冬公會晉侯宋公蔡侯鄭伯陳子莒子邾子秦人于

溫

諱會天王也

天王狩于河陽

全天王之行也爲若將守而遇諸侯之朝也爲天

王諱也水北爲陽山南爲陽溫河陽也

壬申公朝於王所

朝於廟禮也於外非禮也獨公朝與諸侯盡朝也

其日以其再致天子故謹而日之主善以內日惡

以外言曰公朝逆辭也而尊天子會于溫言小諸

侯溫河北地以河陽言之大天子也日繫於月月

繫於時壬申公朝于王所其不月失其所繫也以
爲晉文公之行事爲已慎矣。

晉人執衛侯歸之于京師

此入而執其不言入何也不外王命於衛也歸之
于京師緩辭也斷在京師也。

衛元咺自晉復歸于衛

自晉晉有奉焉爾復者復中國也歸者歸其所也。

諸侯遂圍許

遂繼事也

曹伯襄復歸于曹

復者復中國也天子免之因與之會其曰復通王
命也

遂會諸侯圍許

遂繼事也

二十有九年春介葛盧來

介國也葛盧微國之君未爵者也其曰來卑也

公至自圍許

夏六月公會王人晉人宋人齊人陳人蔡人秦人盟

于翟泉

秋大雨雹

冬介葛盧來

三十年春王正月

夏狄侵齊

秋衛殺其大夫元咺

稱國以殺罪累上也以是為訟君也衛侯在外其
以累上之辭言之何也待其殺而後入也

及公子瑕

公子瑕累也以尊及卑也

衛侯鄭歸于衛

晉人秦人圍鄭

介人侵蕭

冬天王使宰周公來聘

天子之宰通于四海

公子遂如京師遂如晉

以尊遂乎卑此言不敢叛京師也

三十有一年春取濟西田

公子遂如晉

夏四月四卜郊不從乃免牲猶三望

夏四月不時也四卜非禮也免牲者為之緇衣熏裳有司玄端奉送至南郊免牛亦然乃者亡乎人之辭也猶者可以已之辭也

秋七月

冬杞伯姬來求婦

婦人既嫁不踰竟杞伯姬來求婦非止也

狄圍衛

十有二月衛遷於帝丘

三十有二年春王正月

夏四月巳丑鄭伯捷卒

衛人侵狄

秋衛人及狄盟

冬十有二月巳卯晉侯重耳卒

三十有三年春王二月秦人入滑

滑國也

齊侯使國歸父來聘

夏四月辛巳晉人及姜戎敗秦師于殽

不言戰而言敗何也狄秦也其狄之何也秦越千

里之險入虛國進不能守退敗其師徒亂人子女

之教無男女之別秦之為狄自殺之戰始也秦伯

將襲鄭百里子與蹇叔子諫曰千里而襲人未有

不亡者也秦伯曰子之冢木已拱矣何知師行百

里子與蹇叔子送其子而戒之曰女死必於殽之

巖陰之下我將尸女於是師行百里子與蹇叔子

隨其子而哭之秦伯怒曰何為哭吾師也二子曰

葬鑿曰左
氏甚有也

非敢哭師也哭吾子也我老矣彼不死則我死矣

晉人與姜戎要而擊之殺匹馬隻輪無反者晉人

者晉子也其曰人何也微之也何為微之不正其

釋殯而王乎戰也

癸巳葬晉文公

日葬危不得葬也

狄侵齊

公伐邾取訾婁

秋公子遂帥師伐邾

晉人敗狄于箕

冬十月公如齊十有二月公至自齊

乙巳公薨于小寢

小寢非正也

隕霜不殺草

未可殺而殺舉重也可殺而不殺舉輕也

李梅實

實之爲言猶實也

晉人陳人鄭人伐許

卷五終

穀梁傳卷六

文公

元年春王正月公卽位

繼正卽位正也

二月癸亥日有食之

天王使叔服來會葬

葬曰會其志重天子之禮也

夏四月丁巳葬我君僖公

薨稱公舉上也葬我君接上下也僖公葬而後舉

秦梁傳
謚謚所以成德也於卒事乎加之矣

天王使毛伯來錫公命

禮有受命無來錫命非正也

晉侯伐衛

叔孫得臣如京師

衛人伐晉

秋公孫敖會晉侯于戚

冬十月丁未楚世子商臣弑其君髡

日髡之卒所以謹商臣之弑也夷狄不言正不正

公孫敖如齊

二年春王二月甲子晉侯及秦師戰于彭衙秦師敗

績

丁丑作僖公主

作為也為僖公主也立主喪主於虞吉主於練作

僖公主譏其後也作主壞廟有時日於練焉壞廟

壞廟之道易檐可也改塗可也

三月乙巳及晉處父盟

不言公處父仇也為公諱也何以知其與公盟以

其日也何以不言公之如晉所恥也出不書反不致也

夏六月公孫敖會宋公陳侯鄭伯晉士穀盟于垂隴內大夫可以會外諸侯

自十有二月不雨至于秋七月歷時而言不雨文不憂雨也不憂雨者無志乎民也

八月丁卯大事于太廟躋僖公

大事者何大是事也著祫嘗祫祭者毀廟之主陳

于大祖未毀廟之主皆升合祭于大祖躋升也先親而後祖也逆祀也逆祀則是無昭穆也無昭穆則是無祖也無祖則無天也故曰文無天無天者是無天而行也君子不以親親害尊尊此春秋之義也

冬晉人宋人陳人鄭人伐秦

公子遂如齊納幣

三年春王正月叔孫得臣會晉人宋人陳人衛人鄭人伐沈沈潰

禮記
卷之六
禮記

夏五月王子虎卒

叔服也此不卒者也何以卒之以其來會葬我卒之也或曰以其嘗執重以守也

秦人伐晉

秋楚人圍江

雨螽于宋

外災不志此何以志也曰災甚也其甚奈何茅茨盡矣著於上見於下謂之雨

冬公如晉

十有二月己巳公及晉侯盟

晉陽處父帥師伐楚救江

此伐楚其言救江何也江遠楚近代楚所以救江也

四年春公至自晉

夏逆婦姜于齊

其曰婦姜為其禮成乎齊也其逆者誰也親逆而稱婦或者公與何其速婦之也曰公也其不言公何也非成禮於齊也曰婦有姑之辭也其不言氏

何也。貶之也。何為貶之也。夫人與有貶也。不言及。

狄侵齊

秋楚人滅江

晉侯伐秦

衛侯使甯俞來聘

冬十有一月壬寅夫人風氏薨

五年春王正月王使榮叔歸含且賜

含一事也。賜一事也。兼歸之非正也。其曰且志兼

也。其不言來不周事之用也。賜以早而含已晚。

三月辛亥葬我小君成風王使召伯來會葬

會葬之禮於鄆上

夏公孫敖如晉

秦人入都

秋楚人滅六

冬十月甲申許男業卒

六年春葬許僖公

夏季孫行父如陳

秋季孫行父如晉

左傳卷六

八月乙亥晉侯驩卒

冬十月公子遂如晉

葬晉襄公

晉殺其大夫陽處父

稱國以殺罪累上也襄公已葬其以累上之辭言之何也君漏言也上泄則下聞下聞則上聞且聞且聞無以相通射姑殺者也射姑之殺奈何曰晉將與狄戰使狐射姑為將軍趙盾佐之陽處父曰不可古者君之使臣也使仁者佐賢者不使賢者

孫鑿曰此
襄公羊為
等膽

佐仁者今趙盾賢射姑仁其不可乎襄公曰諾謂射姑曰吾始使盾佐女今女佐盾矣射姑曰敬諾襄公死處父主竟上事射姑使人殺之君漏言也故士造辟而言詭辭而出曰用我則可不用我則無亂其德

楊曰以
不敢自
結尾法
甚高

晉狐射姑出奔狄

閏月不告月猶朝于廟

不告月者何也不告朔也不告朔則何為不言朔也閏月者附月之餘日也積分而成於月者也天

子不以告朔而喪事不數也猶之為言可以已也
七年春公伐邾三月甲戌取須句
取邑不日此其日何也不正其再取故謹而日之
也

遂城郟

遂繼事也

夏四月宋公王臣卒

宋人殺其大夫

稱人以殺誅有罪也

戊子晉人及秦人戰于令狐

晉先蔑奔秦

不言出在外也輟戰而奔秦以是為逃軍也

狄侵我西鄙

秋八月公會諸侯晉大夫盟于扈

其曰諸侯略之也

冬徐伐莒

公孫敖如莒莅盟

莅位也其曰位何也前定也其不日前定之盟不

日也

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

乙酉公子遂會雜戎盟于暴

公孫敖如京師不至而復丙戌奔莒

不言所至未如也未如則未復也未如而曰如不廢君命也未復而曰復不專君命也其如非如也

其復非復也唯奔莒之爲信故謹而目之也

各

宋人殺其大夫司馬

司馬官也其以官稱無君之辭也

宋司城來奔

司城官也其以官稱無君之辭也來奔者不言出舉其接我也

九年春毛伯來求金

求車猶可求金甚矣

夫人姜氏如齊金其矢

二月叔孫得臣如京師

京大也師衆也言周必以衆與大言之也

辛丑葬襄王其心實無葬之制也來食者不葬也

天子志崩不志葬舉天下而葬一人其道不疑也

志葬危不得葬也日之甚矣其不葬之辭也

晉人殺其大夫先都

三月夫人姜氏至自齊

甲以尊致病文公也

晉人殺其大夫士穀及箕鄭父

稱人以殺誅有罪也鄭父累也

楚人伐鄭

公子遂會晉人宋人衛人許人救鄭

夏狄侵齊

秋八月曹伯襄卒

九月癸酉地震

震動也地不震者也震故謹而日之也

冬楚子使椒來聘

楚無大夫其曰菽何也以其來我褻之也

秦人來歸僖公成風之襚

秦人弗夫人也即外之弗夫人而見正焉

葬曹共公

十年春王三月辛卯臧孫辰卒

夏秦伐晉

楚殺其大夫宜申

自正月不雨至于秋七月

歷時而言不雨文不閔雨也不閔雨者無志乎民

也

及蘇子盟于女栗

冬狄侵宋

楚子蔡侯次于厥貉

十有一年春楚子伐麇

夏叔仲彭生會晉卻缺于承筐

秋曹伯來朝

公子遂如宋

狄侵齊

冬十月甲午叔孫得臣敗狄于鹹

不言帥師而言敗何也直敗一人之辭也一人而

日敗何也以衆焉言之也傳曰長狄也弟兄三人

佚宕中國瓦石不能害叔孫得臣最善射者也射

其日身橫九畝斷其首而載之眉見於軾然則何

爲不言獲也曰古者不重劍不禽二毛故不言獲

爲內諱也其之齊者王子成父殺之則未知其之

晉者也

十有二年春王正月郕伯來奔

孫饒曰看此數語點綴色態甚濃

獲狄也何諱焉

杞伯來朝

二月庚子子叔姬卒

其曰子叔姬貴也公之母姊妹也其一傳曰許嫁

以卒之也男子二十而冠冠而列丈夫三十而娶

女子十五而許嫁二十而嫁

夏楚人鬪曹

秋滕子來朝

秦伯使術來聘

冬十有二月戊午晉人秦人戰于河曲

不言及秦晉之戰已亟故略之也

季孫行父帥師城諸及鄆

稱帥師言有難也

十有三年春王正月

夏五月壬午陳侯朔卒

邾子蘧條卒

自正月不雨至于秋七月

世室屋壞

大室屋壞者有壞道也譏不脩也大室猶世室也

周公曰大廟伯禽曰大室羣公曰宮禮宗廟之事

君親割夫人親春敬之至也為社稷之主而先君

之廟壞極稱之志不敬也

冬公如晉

衛侯會公于沓

狄侵衛

十有二月己丑公及晉侯盟還自晉

還者事未畢也自晉事畢也

鄭伯會公于棐

十有四年春王正月公至自晉

邾人伐我南鄙

叔彭生帥師伐邾

夏五月乙亥齊侯潘卒

六月公會宋公陳侯衛侯鄭伯許伯曹伯晉趙盾齊

西同盟于新城

同者有同也同外楚也

秋七月有星孛入于北斗

字之為言猶弟也其曰入北斗斗有環域也

公至自會

晉人納捷菑于邾弗克納

是邾克也其曰人何也微之也何為微之也長穀

五百乘脩地千里過宋鄭滕薛魯入千乘之國欲

變人之主至城下然後知何知之晚也弗克納未

伐而曰弗克何也弗克其義也捷菑晉出也獲且

齊出也獲且正也捷菑不正也

九月甲申公孫敖卒于齊

奔大夫不言卒而言卒何也為受其喪不可不卒

張榜曰公
子却克穀
翻案甚妙

也其地於外也

齊公子商人弑其君舍

舍未踰年其曰君何也成舍之為君所以重商人

之弑也商人其不以國氏何也不以嫌代嫌也舍

之不日何也未成為君也

宋子哀來奔

其曰子哀失之也

冬單伯如齊齊人執單伯

私罪也單伯淫于齊齊人執之

齊人執子叔姬

叔姬同罪也

十有五年春季孫行父如晉

三月宋司馬華孫來盟

司馬官也其以官稱無君之辭也來盟者何前定

也不言及者以國與之也

夏曹伯來朝

齊人歸公孫敖之喪

六月辛丑朔日有食之鼓用牲于社

單伯至自齊

大夫執則致致則名此其不名何也天子之命大
夫也

晉卻缺帥師伐蔡戊申入蔡

秋齊人侵我西鄙

其曰鄙遠之也其遠之何也不以難介我國也

季孫行父如晉

冬十有一月諸侯盟于扈

十有二月齊人來歸子叔姬

其日子叔姬貴之也其言來歸何也父母之於子

雖有罪猶欲其免也

齊侯侵我西鄙遂伐曹入其郛

十有六年春季孫行父會齊侯于陽穀齊侯弗及盟

弗及者內辭也行父失命矣齊得內辭也

夏五月公四不視朔

天子告朔于諸侯諸侯受乎禰廟禮也公四不視

朔公不臣也以公為厭政以甚矣

六月戊辰公子遂及齊侯盟于鄆丘

復行父之盟也

秋八月辛未夫人姜氏薨

毀泉臺

喪不貳事貳事緩喪也以文為多失道矣自古為

之今毀之不如勿處而已矣

楚人秦人巴人滅庸

冬十有一月宋人弑其君杵臼

十有七年春晉人衛人陳人鄭人伐宋

夏四月癸亥葬我小君聲姜

齊侯伐我西部

六月癸未公及齊侯盟于穀

諸侯會于扈

秋公至自穀

冬公子遂如齊

十有八年春王二月丁丑公薨于臺下

臺下非正也

秦伯罃卒

夏五月戊戌齊人弑其君商人

六月癸酉葬我君文公魯人
秋公子遂叔孫得臣如齊

使舉上客而不稱介不正其同倫而相介故列而數之也

冬十月子卒

子卒不日故也

夫人姜氏歸于齊

惡宣公也有不待貶絕而罪惡見者有待貶絕而惡從之者姪娣者不孤子之意也一人有子三人

緩帶一曰就賢也

季孫行父如齊

莒弑其君庶其

穀梁傳卷六

卷之二

卷之二

卷之二

卷之二

卷之二

卷之二

